



ӨВӨРХАНГАЙ АЙМАГ  
АРВАЙХЭЭР СУМЫН  
ИРГЭДИЙН ТӨЛӨӨЛӨГЧДИЙН ХУРЛЫН  
ТЭРГҮҮЛЭГЧДИЙН ТОГТООЛ

2017 оны 04 сарын 19 өдөр

Дугаар 24

Арвайхээр

“Арвайхээр сумын иргэдийн Төлөөлөгчдийн Хурал,  
Тэргүүлэгчдийн Хуралдаанд асуудал санаачлан оруулах,  
санал дэвшүүлэх, хэлэлцүүлэх тухай журам” батлах тухай

Монгол Улсын “Үндсэн хууль”-ийн 62 дугаар зүйлийн 62.1, 62.2 дахь заалт, “Засаг захиргаа, нутаг дэвсгэрийн нэгж, түүний удирдлагын тухай” хуулийн 24 дүгээр зүйл, сумын ИТХ-ын 2016 оны 1/02 тогтоолоор батлагдсан “Хуралдааны дэг”-ийн 6 дугаар зүйлийг тус тус үндэслэн иргэдийн Төлөөлөгчдийн Хурлын Тэргүүлэгчдээс ТОГТООХ нь:

1. “Арвайхээр сумын иргэдийн Төлөөлөгчдийн Хурал, Тэргүүлэгчдийн Хуралдаанд асуудал санаачлан оруулах, санал дэвшүүлэх, хэлэлцүүлэх тухай журам”-ыг хавсралтаар баталсугай.
2. Журмыг албан байгууллага, аж ахуй нэгж, иргэд, олон нийтэд сурталчлан, хэрэгжүүлж, идэвх санаачлагатай, хариуцлагатай ажиллахыг ИТХурлын нарийн бичгийн дарга /Ц.Тунгалаг/, Ажлын алба, Засаг дарга бөгөөд хотын Захирагч /О.Пүрэвдорж/-д тус тус үүрэг болгосугай.



Сумын ИТХ-ын Тэргүүлэгчдийн Хуралдааны  
2017 оны 01 дүгээр сарын 19 -ний өдрийн  
21. дугаар тогтоолын хавсралт

АРВАЙХЭЭР СУМЫН ИРГЭДИЙН ТӨЛӨӨЛӨГЧДИЙН ХУРАЛ,  
ТЭРГҮҮЛЭГЧДИЙН ХУРАЛДААНД АСУУДАЛ САНААЧЛАН ОРУУЛАХ,  
САНАЛ ДЭВШҮҮЛЭХ, ХЭЛЭЛЦҮҮЛЭХ ТУХАЙ ЖУРАМ

**Нэг. Нийтлэг үндэслэл:**

1.1. Энэхүү журмаар иргэдийн Төлөөлөгчдийн Хурлын хуралдаан, Тэргүүлэгчдийн хуралдаанд Хурлын Төлөөлөгч, ажлын хороо болон түр хороо, Засаг дарга асуудал санаачлан Хуралд хэлэлцүүлэх, төрийн болон төрийн бус байгууллага, аж ахуйн нэгж, иргэн Хуралд асуудал хэлэлцүүлэхээр санал дэвшүүлж, хэлэлцүүлэх асуудлыг зохицуулна.

1.2. Сумын ИТХурлын хуралдаан, Тэргүүлэгчдийн хуралдаанд Үндсэн хуулийн 4 дүгээр бүлгийн 62 дугаар зүйл, Засаг захиргаа, нутаг, дэвсгэрийн нэгж, түүний удирдлагын тухай хуулийн 3 дугаар бүлгийн 24 дүгээр зүйл, Нийтийн сонсголын тухай хууль, Захиргааны ерөнхий хуулийн холбогдох заалт болон Арвайхээр сумын "Иргэдийн Төлөөлөгчдийн Хуралдааны дэг", "Иргэдийн Төлөөлөгчдийн Хурал, Тэргүүлэгчид, Засаг даргын харилцан ажиллах журам", "Иргэдийн Төлөөлөгчдийн Хурлын Тэргүүлэгчдийн шийдвэр гаргах, хэрэгжүүлэх, үр дүн тооцох журам"-ыг тус тус баримтлан мөрдөж ажиллана.

**Хоёр. Асуудал санаачлан оруулах, санал дэвшүүлэх эрх**

2.1. Иргэдийн Төлөөлөгчдийн Хурлын төлөөлөгч, ажлын хороо болон түр хороо, Засаг дарга асуудал санаачлан Хуралд хэлэлцүүлэхээр оруулах эрхтэй.

2.2. Төрийн болон төрийн бус байгууллага, аж ахуй нэгж, иргэн тухайн шатны Хуралд асуудал хэлэлцүүлэхээр санал дэвшүүлж болно.

2.3. Багийн иргэдийн Нийтийн хурлаас асуудал хэлэлцүүлэхээр санал дэвшүүлж болно.

**Гурав. Асуудал санаачлан оруулах, санал дэвшүүлэх**

3.1. Хурлын төлөөлөгч, ажлын хороо болон түр хороо, Засаг дарга иргэдийн Төлөөлөгчдийн Хуралдаан, Тэргүүлэгчдийн Хуралдаанд асуудал санаачлан хэлэлцүүлэхээр бол "Арвайхээр сумын иргэдийн Төлөөлөгчдийн Хурал, Тэргүүлэгчид, Засаг даргын харилцан ажиллах журам"-ын 4.2 дахь заалтын дагуу тухайн Хурлын хуралдаан зарлагдахаас 14 хоногийн өмнө, 2.1 дэх заалтын дагуу Тэргүүлэгчдийн хуралдаан зарлагдахаас ажлын 7-гоос доошгүй хоногийн өмнө холбогдох материалыа ирүүлнэ.

Үүнд:



3.1.1. тогтоолын төсөл /цаасаар болон файлаар/  
3.1.2. тогтоол боловсруулсан үндэслэл, шаардлага  
3.1.3. холбогдох санхүүгийн тооцоо  
3.1.4. судалгаа, лавлагaa, тайлбар  
3.1.5. шаардлагатай тохиолдолд Засаг дарга болон холбогдох байгууллагаас авсан санал.

3.1.6. хэм хэмжээ тогтоосон шийдвэр бол Захиргааны ерөнхий хуулийн 61, 62 дугаар зүйлийн дагуу материалыг бүрдүүлж, боловсруулсан байх

3.2. Хурал өөрийн дотоод асуудлыг хэлэлцэхэд бусад байгууллагын саналыг шаардахгүй.

3.3. Хурлын дотоод асуудлаас бусад чиглэлээр асуудал хэлэлцүүлэхээр санаачилсан тохиолдолд Засаг даргын саналыг авна. Засаг дарга ажлын 14 хоногт багтаан санал өгөх бөгөөд, санал өгөөгүй тохиолдолд зөвшөөрсөнд тооцно.

3.4. Төсөл санаачлагч Хуралд асуудал оруулахаас өмнө Хурлын байгууллагаас сонгуулийн бүрэн эрхийн хугацаанд хэрэгжүүлэх Үндсэн чиглэл, жил бүрийн ажлын төлөвлөгөө, бусад хөтөлбөр, тухайн жилийн төсвийн төсөлд тусгуулах чиглэлээр ажилласан байх шаардлагатай.

3.5. Энэхүү журамд заасан материалыг бүрдүүлж Хурлын дарга, Тэргүүлэгчид зөвшөөрөл өгсөн тохиолдолд тухайн хуралдаан болохоос өмнө “Засаг захиргаа, нутаг дэвсгэрийн нэгж түүний удирдлагын тухай” хуулийн 24.3 дугаар зүйл болон “Арвайхээр сумын иргэдийн Төлөөлөгчдийн Хурал, Тэргүүлэгчид, Засаг даргын харилцан ажиллах журам”-ын 2.6 дахь заалтын дагуу 1-2 хоногийн өмнө, Хурлын төлөөлөгчдөд эсвэл Тэргүүлэгчдэд тараах бөгөөд энэхүү шаардлагыг хангаагүй асуудлыг хуралдаанаар хэлэлцэхгүй.

#### **Дөрөв. Хуралдаанд асуудлыг танилцуулах**

4.1. Хурлын хуралдаан, Тэргүүлэгчдийн болон ажлын хороо болон түр хорооны хуралдаанд тухайн асуудлыг санаачилсан иргэдийн Төлөөлөгчдийн Хурлын төлөөлөгч, Засаг дарга, ажил хариуцсан албан тушаалтан танилцуулна. Шаардлагатай тохиолдолд асуудал боловсруулан ажлын хэсгийн гишүүн, төрийн албан хаагч, хуралдаан даргалагчийн зөвшөөрснөөр оролцож, тайлбар хийж асуултанд хариулж болно.

4.2. Хурлын хуралдаанаар хэлэлцэх асуудлыг тухайн асуудал эрхэлсэн хорооны хуралдаанаар урьдчилан хэлэлцэж, санал дүгнэлт, санал хураалгах саналын томьёоллыг бэлтгэн хуралдаанд оруулна.

4.3. Асуудал санаачилж байгаа субъект хуралдаанаар хэлэлцүүлэх асуудлын талаар хэвлэл мэдээллийн хэрэгслээр сурталчлах, иргэд, олон нийтийн саналыг авах хэлэлцүүлэг зохион байгуулж болно.

4.4. Хуралдаанаар хэлэлцүүлэх асуудалтай холбогдуулан урилгаар оролцуулах албан тушаалтан, иргэдийн нэрсийг Хурлын дарга, Тэргүүлэгчдийн нарийн бичгийн даргад урьдчилан ирүүлнэ.

4.5. Хурлын төлөөлөгчдөд тараасан хэлэлцэх асуудлын баримт бичгүүдтэй төрийн бус байгууллага, иргэдэд танилцах боломж олгох зорилгоор тусгай өрөө, танхим ажиллуулж болно.

4.6. Хуралдаанд асуудал хэлэлцүүлэхээр санаачилсан болон санал тавьсан субъект нь тухайн асуудлыг Хуралдааны танхимаас өөр газар явуулын хуралдааны журмаар хуралдуулах санал тавьж болно.

